

# Reproduccion di un articulo di Diahuebs 8 di September 1994

PAGINA 4

DIARIO

DIAHUEBS 8 SEPTEMBER 1994

**Jossy Mansur:**

## MI AMISTAD TA CU UN PATRIOTA, NO UN GOLPISTA!

ORANJESTAD(AAN)Tin hende cu ta gusta papia o skirbi djis pa duna nan mes importancia, especialmente, ora ta trata topiconan cu nan no conoce a fondo o kier usa pa expresa algun tendencia politico straño.

Un tal José Maduro a expresa den otro matutino cu mi amistad cu un "golpista" no ta yene cu orguyo. Esey en realidad ta su problema, no di mi. Pero, ora e compara Maurice Bishop (dictador comunista) cu Comandante Hugo Chavez (militar y patriota), e ta demostra un falta di criterio lamentable y un desconocimiento fatal di e realidad politico Venezolano.

Comandante Chavez a lanta contra un gobierno cu a hiba corrupcion te na e grado di un ciencia malvado; el a lanta contra un gobierno abusador y violador di derechonan humano (lesa e raport di Amnesty!); un gobierno cu a benta Venezuela den un abismo for di cual ta bay costa hopi decada sake! Unda otronan tabata papia, Chavez a actua. El a expone su carera militar, su compañeronan di arma, su famianan y su bida pa substitui un democracia corrupto y denigrante cu un democracia real.

José Maduro a lubida cu e actual Presidente di Venezuela, Rafael Caldera, a gana eleccion danki na e lantamento di Chávez cu a

inicia e caida di e gobierno putri di CAP? José Maduro no a scucha e discurso di Presidente Caldera algun dia despues di e lantamento, splicando y interpretando e lantamento militar, no como golpi di estado, sino como e manifestacion bibo di e frustracion y desesperacion di Pueblo Venezolano frente un corrupcion degradante y ofensivo? E no a scucha e discurso di Dr. Arturo Uslar Pietri, cu a bay den e mesun tono? José Maduro conoce dos homber na Venezuela mas democratico cu Caldera y Uslar?

Pakico José Maduro ta kere cu Presidente Caldera a duna Chavez indulto? Si e tabata un simple "golpista" hembra pa poder dictatorial, te ainda e lo ta cera na San Carlos!

Y Kico Chavez a haci despues cu el a haya e indulto? El a dreña e fila di e demócratanan, a encabeza un movimiento politico cu yama 'Movimiento Bolivariano' pa participa den e proximo eleccion, contando den actualidad cu mas di 60% di e protestativonan! Hasta MAS y Causa R ta perdiendo masha hopi hende cunel!

Ami no por ta amigo nunca di e enemigonan di democracia, y mi a demostra esey contra Maurice Bishop, kende contrario na Chavez, tabata un dictador comunista cu tabata tin e



pueblo di Grenada oprimi. Chavez a haci un intento pa libera su Pueblo di un situacion di corrupcion barbaro cu tabata insostenible. Loke e no por a haci, o sea detene CAP y mande prison, e actual Ministro di Relacionnan Interior, Dr. Ramon Escovar Salom si a haci y ata CAP preso na su cas, cu un polis montando warda dilanti di su porta.

Si mi ta amigo of no di Chavez ta mi asunto. Pero, mi no ta y no por ta nunca amigo di esnan cu ta ambiciona poder absoluto pa oprimi Pueblo. Awor cu Chavez ta un politico activo na Venezuela, y mientras e sigui move den e ambito democratico di e pais mescos cu tur otro politico, mi kier ta su amigo mescos cu mi ta amigo di masha hopi otro politiconan di otro tendencianan y ideologianan.

José Maduro mester comprende cu amistadnan por dura o por desaparece cu tempo, dependiendo di e

grado di comprension o di comparticion di idealnan cu por ta existi na dado momento entre dos persona. Mi amistad ta cu un patriota cu a risca hasta su bida pa trece alivio na su pais na momentonan di desesperacion extremo y impotencia absoluto contra un corrupcion abusivo cu a pone e moral publico di e gobierno di Venezuela na nivel di suela tempo di CAP. Awendia Chavez ta un politico democratico, cu tur su derechonan hancra den e Constitucion di su pais, moviendo libremente den un ambito democratico cu el a yuda crea.

E hendenan cu ta rondone ta hendenan democratico, bankeronan y comercianten serio, sidicalistanan activo, militanan y ex-ministronan cu a logra conserva nan idealnan patriótico por encima di nan compromisonan politico, docternan y abogadonan prominente (tur tabata presente na e

"Cena de la Esperanza" na Hotel Avila). Mi a scucha cu mi mesun horeanan conversacionnan cu tabata drey rond di e temanan politico, economico y social di Venezuela, y no arenganan subversivo, y mi a mira cu mi mesun wowonan cu no tabata tin 'lanza-bomba' ni guerihero presente.

Por ultimo, Chavez no ta un profugo di husticia, e no ta un fugitivo manera mayoria di e amigonan di Hendrik y CAP, kendenan ta ser busca pa autoridadnan pa nan para responsable pa nan crimennan contra Pueblo! Chavez ta un patriota y un politico activo den un mundo di democracia pluralista (no publicista ni populista, ni corruptista!) E ta un homber admira pa mas di 60% di e protestativonan na Venezuela (cu ta e mayoria di Pueblo), kendenan ta simpatiza cune y ta respalde totalmente. Cu mi ta amigo di dje? José Maduro por ta sigur di esey!

### Centro di Pesca Hadicurari

Situa entre:  
Holiday Inn y Marriot

Habri tur dia  
di 8am pa 10pm.

Cu surtido amplio di bebidanan bon  
frijey y snacknan pa un y tur.



CENTRO DI PESCA

**Unda henter famia ta pasa un  
rato ameno.**

**TELEFONNAN DI DIARIO  
826747- FAX 828551**